

EMPLEADONAN DI HOH CU ENTRENAMIENTO PA E SISTEMA HIX



WWW.SOLODIPUEBLO.COM



SOLODIPUEBLO@GMAIL.COM

Na momento cu a bandona gobierno; GABINETE WEVER-CROES A LAGA TUR COS CLA PA GOBIERNO POR INVERTI DEN ENSEÑANSA



AHATA: REVPAR A STAGNA PA DI DOS LUNA CONSECUTIVO

A.T.A. TA FINALISA RENOBACION DI BANKINAN NA BOCA CATALINA / MALMOK



SV BRITANNIA A RICIBI CHARLA DI ANTI DOPING Y FAIR PLAY

DEPARTAMENTO DI LABOR TA ADAPTA SU SERVICIO RIBA DIABIERNA 11 DI JULI 2025

- Departamento di Labor y Investigacion ta participa na tur cliente cu riba diabierna 11 di juli 2025 nos ta adapta nos servicio. Riba e fecha menciona lo duna servicio via telefon y tambe via email. Esaki en conexion cu mantencion grandi di e sistema di airco nos piso o.

Riba e dia aki nos Departamento lo ta disponibel via telefoon entre 8:00'or pa 11:00'or di mainta y di 1:00'or pa 3:00'or di atardi, of via

email directiearbeid@aruba.gov.aw.

Pa casonan di problema di trabao y/of intermediacion por tuma contacto cu Departamento di Conflicto riba un di e numbernan aki bou

☐ 593-6934

☐ 593-8549

Pa comunica cu e otro seccionnan di nos

Departamento por tuma contacto riba e number:

☐ 594-3573

Dialuna 14 di juli 2025 nos oficina lo ta habri bek segun orario normal.

Nos ta pidi disculpa si esaki por trece cualquier inconveniencia.

A.T.A. TA FINALISA RENOBACION DI BANKINAN NA BOCA CATALINA / MALMOK



Como parti di e proyecto di renobacion di palapa y banki, Aruba Tourism Authority (A.T.A.), den colaboracion cu ACE Engineering, ACF, DOW y ALBO, a completa diamars dia 8 di juli, e trabou na Boca Catalina / Malmok. Esaki ta trata di e reemplazo di seis banki y tambe e mantencion di diesun banki di cement ya existente.

E iniciativa aki ta un paso importante como parti di A.T.A. su esfuersonan continuo pa mehora

seguridad publico y tambe mehora e experiencia di bishitantenan na e playanan di Aruba. Un residente local, cu ta bishita Boca Catalina / Malmok tur dia pa relaha, a muestra hopi aprecio pa e bankinan. E la comparti cu atardi ta hopi druk na e sitio y hopi hende ta reuni pa disfruta di e bista espectacular cual ta e bahada di solo. E bankinan nobo awor ta haci cu mas hende por disfruta di momentonan special banda di lama na un manera mas confortabel.



E proyecto tin su plan di mantencion pa largo plazo cu ta garantiza cu e facilidadnan lo keda den bon condicion pa uzo continuo di e publico. A.T.A. ta orguyoso di ta contribui na proyectonan

cu ta proteha e herencia natural di Aruba y ta promove e uzo responsabel di nos espacionan na nos costa. Tambe mester menciona cu na Mangel Halto e “fase 2” di e proyecto ta andando cual ta e instalacion di palapa

nobo. Bankinan nobo lo sigui den poco tempo.

A.T.A. ta pidi e comunidad pa yuda cuida e facilidadnan nobo pa uzo y bienestar di nos comunidad y di tur cu ta bishita.

KEDA SIN PAGA BOET = PERDE VUELO

Grenspolitie na aeropuerto lo sigui stop viaheronan cu debe di boet. Tambe durante e periodo di vakantie cu nos ta drentando!

Personanan cu debe di boet ta core riesgo di wordo para dor di Grenspolitie y di lo no por sigui cu nan viahe te cu nan cumpli cu nan boet. Den algun caso esaki por haci hasta cu nan ta perde avion.

Si resulta cu un persona no por of no kier paga nan boet, CEA lo traslad'e pa KIA pa e sinta su dianan di detencion. Tanto pa hende homber

como hende muher tin cel disponibel den KIA.

Pesey Ministerio Publico ta haci un yamado urgente na viaheronan cu debe di boet pa paga esaki mas liher posibel y asina evita di topa cu un sorpresa desagradable na airport.

Bo persona por paga online via ArubaBank riba cuenta bancario 4000905, bao mencion di bo parketnummer.

Tambe por paga na caha di Ministerio Publico

na Rumbastraat 29 cu bancomatico of cash.

Bo tin pregunta tocante bo boet? No problem. Manda un email sin compromiso na info@omaruba.com aw of haci uso di e formulario di contacto riba www.omaruba.com.



Un paso importante den prepara e sistema electronico di pashent EMPLEADONAN DI HOH CU ENTRENAMIENTO PA E SISTEMA HIX

Recientemente Horacio Oduber Oduber (HOH) a duna di conoce un proyecto importante cu e meta principal ta eleva calidad di cuido cu ta introduccion di un sistema electronico di pashent (EPD) nobo di e compania Hulandes Chipsoft cu e programa HiX. Pa implementa e plataforma ta importante pa train empleadonan cu tin cu bay traha cu e sistema nobo aki. Ademá, e transicion di e sistema actual pa e nobo aki tin su reto y mester prepara bon pa esaki. Pa cu esaki a tene pa algun siman e asina yama 'projectopleidingen' unda cu coleganan a sigui curso di forma digital y tambe despues cu e entrenadornan fisicamente presente.

Planning

Gregory Croeze, Miembro di Junta Directiva, a expresa cu e planning pa e sistema nobo bay 'live' otro aña ta uno bastante preta. P'esey e preparacionnan aki ta sumamente importante mirando cu den luna di augustus ya caba ta cuminsa

cu e "inrichtingsweek" unda cu lo hinca e "features" pa cada departamento cu lo uza e plataforma aki. Ta papia aki di e departamentonan di cuido pero tambe di e departamentonan di voeding, radiologia, finansa, bloedbank y mas pa un integracion completo.

Personal involvi

Virgil Oehlers, Manager di ICT, a bisa cu esaki ta un di e simannan di mas importante pa e team involvi. Tin mas o menos 200 colega cu ta forma parti di e proyecto enorme aki y durante e ultimo siman un total di 25 "consultants" a bin for di Chipsoft y tambe di Furore pa duna nan training simultaneamente. Esaki berdaderamente ta demostra e magnitud di e proyecto y e personal cu a yega Aruba ta yuda no solamente garantiza progreso den e planning pero ta sinta hunto cu stakeholder y cualkier colega cu tin pregunta ainda pa asisti y soluciona cualkier otro problema cu por tin.

Michael Padaoan y Selene Fabry, ambos nurse di ICU, a conta cu a nan a haya orientacion con e sistema mes ta hinca den otro pero tambe nan a siña con pa traha cune pa despues nan por ehecuta tur locual nan a siña na nan departamento. Shanice Stokes, nurse na departamento di A2, ta spera di por adapta lihe na e sistema nobo y siña mas hopi cu por pa asina duna un miho cuido na e pashentnan riba piso.

Bentahanan pa HOH

Pa finalisa Jacco Vroegop, Presidente di Junta di Directiva, a duna di conoce cu e ta un proyecto cu nan ta trahando riba dje pa hopi tempo caba y cu awo pa tres siman largo tin personal di Chipsoft y Furore presente pa duna training y sinta den tur training conhunto cu e empleadonan di HOH pa mira cualkier asunto cu por soluciona di biaha. E ta spera mirando e entusiasmo bou di colega cu ta participando ta yuda stimula y motiva otro coleganan den sector di cuido rond di Aruba pa



asina por establece HiX na otro organisacionnan tambe. Cu implementacion di e sistema electronico di pashent nobo aki, HOH ta tuma un paso grandi pa un plataforma integra cu ta garantiza uniformidad y standardisacion den e procesonan di cuido. Tambe lo ofrece entre otro

bentahanan manera un miho documentacion y registracion y cuido basa riba data.

Esakinan lo conduci na mehora eficiencia y seguridad pa un sosten optimal di cuido y mas atencion na pashent.

Eduard Pieters di PPA: SITUACION TA DIFERENTE AWE Y NO TIN ESPACIO PA MAS HOTEL SI KIER DUNA PRIORIDAD NA SOSTENIBILIDAD

Durante un conferencia di prensa, Eduard Pieters, miembro activo di PPA, a presenta un topico basta fuerte relaciona cu e rechazo di un amienda vital pa nos futuro. E amienda, presenta pa PPA, tabata enfoca riba e presupuesto di TPEF (Tourist Product Enhancement Fund), unda a propone cambio crucial den legislacion, pa para of pospone construccion di casi 1000 camber hotelero. Desafortunadamente y a pesar cu e propio minister di turismo, Wendrick Cicilia, cu ta responsabel pa e fondo aki y a reconoce e propuesta como uno "interesante", e parlamentarionan di coalicion AVP-FUTURO no a duna oportunidad pa evaluacion of dialogo profundo di e amienda presenta. "No Mas Hotel" ta loke pueblo ta sclama

E amienda no tabata solamente un texto legal, sino un refleho di loke ta biba bou di nos pueblo, pa stop cu construccion descontrola. Riba un isla cu ta sinti e presion social y ambiental cada dia mas fuerte,

ta irresponsabel pa sigui aproba proyecto pa mas hotel sin un vision duradero y sostenibel. P'esey mes Eduard Pieters di fraccion di PPA a splica cu e e amienda aki tabata un proposicion pa pone un paro real den crecemento, cu ya a yega su limite.

Sostenibilidad pero sin contenido?

Segun Pieters, e gobierno actual ta papia hopi di sostenibilidad. Pero sostenibilidad sin accion ta un ilusion. E amienda tabata e instrumento pa balansa economia, husticia social y proteccion ambiental. E amienda aki tabata un netamente un oportunidad pa pone e "sustainability fee" na trabou real, cu resultado real y asina nos hiba un bida bon sin compromete e posibilidadnan di nos futuro generacion.

Lobby y interes particular ta frustra cambio real

Loke ta remarcabel ta, cu den e ultimo reunion publico y den prensa, aparentemente gobierno a informa cu lo hiba



combersacionnan cu e cadenan mundial di hotel of cu esnan cu tin e permisonan necesario pa construi e 1000 camber extra. "Per e realidad ta cu un empresario kier haci negoshi cu e permiso cu el a haya den pasado. Nan no lo pensa cu nan curason y tene cuenta cu e un speech elocuente of sentimento di un of mas minister. Nan djis kier haci negoshi y ta p'esey nan a pidi dicho permisonan pa traha placa," Eduard a subraya.

PPA ta sigui lucha pa futuro

Fraccion di PPA ta sigui firme den su vision: un Aruba pa tur su ciudadano, basa riba un futuro cu calidad di bida, naturaleza protegi y un turismo cu ta sirbi e pueblo y no solamente e saconan di algun

comerciante. "Nos no ta den gobierno, pero nos lo sigui lucha," segun Pieters. "Sostenibilidad real ta un deber, no un slogan."

Finalmente Eduard Pieters di fraccion di PPA ta invita tur fraccion pa pone pueblo na prome lugar y pa bolbe na mesa pa dialoga riba e contenido di e amienda presenta. Ainda tin tempo pa traha e cambio cu Aruba realmente merece. "Nos ta na tempo ainda pa no crea un rabia, fobia, descriminacion y rechazo entre e localnan y e turista. No ban hunga, cu practicamente, e unico pilar di economia di Aruba. No ban hunga cu husticia social y pone un presion riba nos medio ambiente", Eduard a finalisa bisando.

DAMA A BIRA MALO DEN SUPERMARKET Y A SAK DEN OTRO

Diahuebs mainta tempran a drenta informe di cu un hoben di 19 aña no ta reacciona verbal, mesora a dirigi ambulans na e sitio. Na caminda pa e sitio a drenta otro informe indicando cu e hoben awor ta scumando y cu e mama no ta sigur pero e lo por a usa un substancia. Na yegada di e ambulans nan a atende e hoben y a transporte pa hospital.



Fraccion di MEP

Na momento cu a bandona gobierno;

GABINETE WEVER-CROES A LAGA TUR COS

CLA PA GOBIERNO POR INVERTI

DEN ENSEÑANSA

Aña escolar 2024-2025 ta tras di lomba. Te cu 3 luna pasa Gobierno di Gabinete Wever-Croes tabata encarga cu enseñansa y ta mira atras riba un gran parti di e aña hopi exitoso.

Gabinete Wever-Croes durante gobernacion a crea espacio financiero lagando atras un surplus

di 500 miyon florin di cual por uza parti pa inverti den enseñansa. A aumenta e norm bedrag, a hasi e dialogo y a laga e trabounan pa restructura salario di maestronan.

Hunto cu SIMAR a laga 3 scenario atras djis pa e gobierno nobo finalisa. Tambe a laga tur plan

atras pa construi un scol secundario nobo na Paradera.

Despues cu Gabinete Wever-Croes a sali di gobierno 3 luna pasa, lamentablemente tur cos a paralisa. Tin manera un STILSTAND den gobernacion na Aruba. Esey ta consecuencia ora no tin gobierno completo,

no tin liderasgo, y no tin gobernacion.

Fraccion di MEP ta spera cu pronto tin movecion.

E deseo ta pa Aruba ta un lugar dushi pa biba pa nos muchanan, nos hobennan y nos maestro y docentenan. Y lo sigi lucha desde Parlamento pa crea e Aruba aki dushi pa biba.



COMPARTIENDO INFORMACION IMPORTANTE

DEN CUADRO DI ANTI-DOPING Y “FAIR PLAY”

ARUNADO cu charla di Anti-Doping na ekipo campeon di Aruba su Division di Honor, Britannia.

Diaranso ultimo na Compleho Deportivo Frankil Bareño, ARUNADO (Aruba Anti-Doping Organisation) a tene un charla cu e ekipo di futbol di Britannia, cu a recien a titula como campeon de e division di honor di futbol. Pa ARUNADO a duna e charla sra. Angelique Koolman, sra. Roraima Arends y sr. Patrick Werleman. E charla aki a tuma luga den cuadro di nan participacion na e CFU Club Shield 2025 na Trinidad y Tobago cu lo tuma luga fin di luna awo.

Mester bisa cu e participacion di e grupo

tabata sumamente interactivo y cu hopi entusiasmo, unda a haci hopi pregunta, a dunacomentario durante e charla y no solamente di hungadonan pero tambe di dirigentenan. A para keto ampliamente na e proceso di control di doping y tambe riba otro topiconan manera e TUE, riesgo di uzo di suplemento y tambe a practica con pa haya sa (via Globaldro.com) si un medicamento tin un substancia prohibi. Tambe a duna un presentacion tocante Match Fixing den cual a trata e importancia pa NO comparti informacion sensitivo



di team, NO bet riba bo propio wega of deporte, NO manipula bo wega y SEMPER raporta ora constata algo sospechoso.

ARUNADO ta gradici Club Britannia pa tuma e iniciativa pa haya e charla importante aki y ta desea

nan hopi exito pa cu nan competencia na Trinidad y Tabago. #TEAMARU #ARUNADO

Invita pa A.T.A.: Talento internacional di futbol na Aruba pa regenera energia riba suela local

DENZEL DUMFRIES TA HACI DONACION DI BALA DI FUTBOL PROFESIONAL NA AVB



Denzel Dumfries a anuncia cu e lo haci un donacion di mas o menos 60 bala di futbol profesional di Adidas na AVB (Arubaanse Voetbal Bond) pa sostene e clubnan local. E strea internacional di futbol, cu tin rais Rubiano, ta riba su One Happy Island despues di forma parti di e Copa Mundial di Club di FIFA 2025 cu Inter Milan.

El a haci e anuncio special durante un 'meet & greet' oficial cu e representantenan di AVB, cu Minister di Relacionnan di Reino, Enseñansa, Hubentud, Innovacion y Deporte, mr. Gerlien Croes y cu e CEO di Aruba Tourism Authority, Ronella Croes.

Denzel a regresa Aruba, su hogar leu for di cas, pa regenera su alma riba suela conoci y capta kico e isla ta nifica p'e pa medio di un colaboracion special di contenido cu Aruba Tourism Authority. Como cu Denzel ta ansioso

pa duna bek n'e isla cu a yuda pa forma su carera den futbol, e ta probecha di e oportunidad pa provee e clubnan di futbol local cu balanan profesional di futbol.

"Aruba ta mas cu djis un pida paraiso, e ta un parti integral di mi herencia. E isla ta duna mi un sentido di pertenencia como tambe un impulso increibel pa salud mental. Aruba

tambe a yuda mi durante mi añanan di formacion como un hungado di futbol y p'esey ta hopi importante pa mi duna bek na e isla. Pa apoya e clubnan local y hubentud local y brinda nan oportunidadnan pa crece a traves di futbol, mescos cu ami a haci", tabata expresion di Denzel Dumfries. Mas durante aña lo otorga AVB e balanan di futbol.



AHATA: REVPAR A STAGNA PA DI DOS LUNA CONSECUTIVO





ORANJESTAD, Aruba – 10 Juli 2025: Aruba Hotel & Tourism Association (AHATA) tur luna ta acumula e cifranan di ocupacion y prijs di hotelnan. Den e cifranan di Juni, Presidente y CEO di AHATA, Tisa LaSorte, ta nota cu tin un patronchi nobo.

Pa di dos luna consecutivo e cifras ta indica cu RevPAR (entrada averahe pa camber disponibel) di hotel na Aruba a stagna. E inventario di camber di hotel y di condominio na Aruba a crece pero e cantidad di turista cu ta skohe pa estadia na hotel no a crece. Aunque ADR (prijs di kamber) ainda ta un tiki mas halto cu añanan anterior, e ocupacion averahe na hotel ta bahando. Cobrando un prijs mas halto, e hotel ainda por mantene un nivel di entrada cu ta sostiene empleo, inversion, gastonan creciente, y entrada pa e inversionista.

Na Juni, e RevPAR tabata \$256.61 cu ta casi mescos cu e año anterior. Na Mei a experiencia mesun resultado sin crecimiento, confirmando asina e patronchi cu RevPAR a stop di crece. Gastonan di empresa a subi den ultimo añanan, locual ta subraya e importancia di mantene un RevPAR saludabel. E exito di nos sector turistico ta traduci su mes directamente den seguridad economico pa hopi famia Arubano, y ta contribui na fondonan esencial pa servicionan publico y sosten pa negoshinan local.

Den ultimo lunanan a nota un rebaho den demanda pa reservacion for di Merca pa resto di año. E proyeccion original pa ocupacion averahe di hotel na 2025 tabata 81%. Luna pasa e proyeccion a baha te 76.4%, y e luna aki ela sigui baha un tiki pa yega 75.8%.



**CAMBIA PERSPECTIVA
TOCANTE OBESIDAD:
SA BO NUMBER Y MIDI
BO PESO**



Parlamentario Evelyn Wever-Croes

Despues di un año escolar exitoso;

PARLAMENTARIO EVELYN WEVER-CROES TA GRADICI TUR MAESTRO Y DOCENTE PA NAN ESFUERSO Y DEDICACION NA EDUCACION DI NOS YIUNAN

- E año escolar 2024-2025 a yega na su final. Parlamentario Wever-Croes a expresa cu e año escolar tras di lomba tabata tin hopi reto pa e veld di enseñansa, pero cu hopi orguyo ta mira atras con maestro, maestra y docentenan a surpasa cada un di e retonan aki.

Tambe ta hopi bunita pa mira e desaroyo grandi di inovacion den enseñansa,

danki na e creatividad y determinacion di e maestro y docentenan.

“Awe mi kier gradici boso. DANKI pa dedica bo na educacion y enseñansa di nos muchanan y hobennan. Danki pa e pasion cu boso tin pa enseñansa y e amor pa nos alumno y studiantenan.

Mi proposito den politica ta pa crea un Aruba cu ta

dushi pa nos biba den dje, y un Aruba dushi pa nos muchanan y hobennan crece den dje. Y boso ta instrumental den logra e Aruba aki, cu ta dushi pa biba

Goza di e vakantie bon mereci, descansa, relaha y recarga e energia. Un biaha mas DANKI!”
Parlamentario Wever-Croes a expresa.



Parlamentario Evelyn Wever-Croes

Aruba ta conoce un hurista nobo mas;

SEÑORA INDRA ZAANDAM TA LOGRA SU DIPLOMA DI MEESTER IN DE RECHTEN



Diaranson ultimo Parlamentario Evelyn Wever-Croes hunto cu Parlamentario Xiomara Maduro tabata na Universidad di Aruba na unda señora Indra Zaandam a defende su tesis pa asina gradua como Meester in de Rechten. E

tesis di señora Zaandam tabata riba e posicionnan y relacionnan den Reino y con pa fortifica e posicion di e paisnan Aruba, Corsou y Sint Maarten den e relacion di Reino.

Den su tesis, señora Zaandam a bin cu hopi proposicion y recomendacion con por cambia reglamento di ordo di Rijksministerraad pa asina duna pais manera Aruba mas voz y mas derecho. Cu esaki Aruba por yega na un relacion mas igual basa riba respet na unda puntonan importante y necesario pa

Aruba por wordo atendi na un miho manera.

Parlamentario Wever-Croes a indica cu e tema aki ta uno hopi complica, mirando cu no tin hopi literatura riba dj'e, pero cu señora Zaandam a haci un tremendo trabou riba esaki. Señora Zaandam a traha tambe hopi serca di relacionnan di Reino den pasado cu sigur a yuda hopi cu awe e por a logra un 8 pa su tesis y pa su manera di defende loke el a presenta.

“E tabata un honor pami y pa colega Xiomara di por tabata presente y scucha



con señora Zaandam a defende su tesis. E ta un persona cu hopi conocimiento y nos ta super orguyoso di por tabata parti di e logro grandi aki di dj'e. Den Gabinete Wever-Croes I y II, Indra a hunga un papel hopi importante ora ta trata di

relacionnan cu Reino y awe tur e conocimiento aki ta concretisa den un diploma di Meester in de Rechten. Mi kier a felicita Indra cu su gran logro y ta desea su persona hopi exito den su carera profesional”
Parlamentario Wever-Croes a expresa.

INSTRUMENTONAN DI PODER ECONOMICO Y INCLUSION ECONOMICO ENTREGA DIRECTAMENTE NA PUEBLO DI ARUBA

Suzette Dumfries ta lansa e último capítulo di e serie di Masterclass ‘Power Moves’: Un mision pa empodera Arubano pa inclui nan mes den nos desaroyo economico.

Pa prome biaha, economista y constructor di nacion -nation builder- Suzette Dumfries ta pone e instrumentonan di poder economico directamente den man di pueblo di Aruba pa medio di su iniciativa di transformacion di comunidad “Power Moves.” Dumfries ta bisa: “Esaki no ta teoria. Esaki ta transformacion.”

Dumfries ta kere firmemente cu un economia ta wordu kreá dor di e pueblo y pa e pueblo, pero solamente ora pueblo ei tin acceso real na oportunidad y e medionan pa actua. “Si nos no ta doño di loke nos ta construe como pais,” e ta bisa, “nos ta djis espectadornan den historia di nos mes pais.”

Mirando bek riba dos decada di crecimiento economico na Aruba, un cos ta dolorosamente cla: loke a sosode na Noord no por wordo ripiti. E desaroyo tabata real, pero tambe e exclusion. Arubianonan a construí, sirbi, limpia, crea—pero nan no tabata doño.

Awor cu San Nicolas ta na rand di su propio lantamento economico, Dumfries ta determina pa cambia e narativo ey. San Nicolas ta e siguiente capitulo den historia economico di Aruba, y su mision ta pa percura pa Arubianonan no sinta na banda, pero mas bien fungi como doño di e progreso.

E mision ey a haya forma den Power Moves—un serie di masterclass di tres parti cu ta siña Arubianonan con pa construi rikesa colectivo pa medio di compra colectivo di propiedad comercial. Na Mei, Parti 1 di e serie di masterclass Power Moves, a trese hende huntu pa forma gruponan di invershonista y dal nan promé pasonan pa ta propietario. Huntu cu arquitecto Gershon Pocorni y notario Ted Johnson, Dumfries

a siña partisipantenan con pa crea grupnan di inversion, crea structuranan legal, identificá edifisionan, y sigui padilanti huntu pa inversion colectivo.

Na Juni, Parti 2 a bai mas profundo. Cu voznan clave di e mundo di finanzas y seguro, incluyendo Paul Vandormael di e mundo di Finanza Corporativo y Henry van den

Bergh, Managing Director di ENNIA, e partisipantenan a haya sa exactamente unda e placa ta, cuanto di dje ta circulando na Aruba y kico institucionnan kier wak den un business plan prome cu bisa si. E tabata un curso di tempu pa compronde con capital ta funciona – y con pa haña akses na dje.

Awor, na Juli, ta bini e parti mas importante: Parti 3 – E Plan di Negoshi Finansiabel.

Durante tres dia, 12, 13 y 14 di Juli, Suzette Dumfries lo splika personalmente kico mayoria hende nunca ta haña e chèns di siña: e método real cu banconan, aseguradonan y fondonan di invershon ta usa pa determiná ken ta haña finansiamentu y ken no.


Partisipantenan lo siña cua indicadónan financiero ta importante, con pa evaluá riesgonan, ki medidanan di proteccion banconan kier wak den e lan y con pa skirbi un plan di negoshi cu ta papia e idioma di finansiadónan – pa asina nan duna un berdadero ‘sí’.

Dia 1 ta enfocá riba e indicadónan financiero clave y e proporcionnan cu ta wòrdu usá pa evaluá si un proyecto ta bankabel. Dia 2 ta explora strategianan di riesgo, proteccion y seguro—y dikon nan ta importante pa inversionistanan. Dia 3 ta trese tur cos huntu den un sesion di skirbimentu poderoso cu ta muestra partisipantenan exactamente con pa crea un plan di negoshi suficientemente fuerte pa move capital.

Esaki ta un oportunidad di un biaha den bida y un asercamentu sumamente estimulante, pasobra hende lo siña finalmente kico bankonan, aseguradonan y invershonistanan ta buscando realmente ora di disidí cua plan y proyektonan pa finansiá. Suzette Dumfries ta hasi esaki pasobra e ta kere cu progreso y prosperidad mester wordo compartí. Poder mester wòrdo siña. Y oportunidad mester ta habri pa tur hende. “Pasobra ora San Nicolás lanta, Arubianonan mester ta doño di un pida di dje,” e ta bisa.

TOCANTE SUZETTE DUMFRIES

Suzette Dumfries ta un economista, antropologo y nation builder. E ta traha den Caribe y Medio



Oriente y ta diseñá economianan inclusivo y empoderá comunidatnan pa crea rikesa, reclamá espacio y forma nan futuro. Su trabou ta combina desaroyo, cultura y empoderacion—tur ankrá den un solo berdad: ser propietario ta poder.

Pa entrevista of mas informacion por tuma contacto cu:

MÓBIL: +297 740 5430

Clasificados










SOLODIPUEBLO@GMAIL.COM

CEL. 585 9500



BAKI DEN BARIO DI SAN NICOLAS: PROBECHA UN BIAHA MAS PA DESHACI DI DESPERDICIO

Diaranson mainta, e ekipo di Baki den Bario a anuncia e siguiente actividad di Baki den Bario, cu lo bolbe tuma luga na San Nicolas. Baki den Bario ta un proyecto bao coordinacion di Bureau City Inspector, DOW y Serlimar na unda ta pone un cantidad di baki grandi na un sitio den cual e habitantenan di e bario por trece nan desperdicio residencial y deshaci di esakinan na manera responsabel.

Despues di e exitoso Baki den Bario cu a tuma luga pariba di Watertoren na San Nicolas, e habitantenan a haci un peticion na Gobierno pa trece Baki den Bario un biaha mas mirando cu hopi habitante no a haya e oportunidad pa deshaci di nan desperdicio durante e accion di Baki den Bario. E biaha aki, lo pone e bakinan grandi di

sushi, riba e veld dilanti di Botica Centro Medico / Pit Stop Restaurant situa den Bernhardstraat.

Sr. Maikel Gomez, vocero di Bureau City Inspector a informa cu comunidad di San Nicolas y vecindario por deshaci di nan desperdicio residencial for di tempran di mainta, 7:00 AM te cu 11:00 AM. Ademá sr. Gomez a informa cu e entrada pa yega na e bakinan di desperdicio ta via e caminda di Zeewijk. Lo tin control na entrada y salida pa asina garantiza un bon fluho di trafico y pa matene ordo. Esnan cu lo trece desperdicio mester tene bon cuenta cu no ta permiti trece ni azeta bieuw ni asbest, pero tampoco sushi comercial.

Sra. Natalie Wolff, vocero di Serlimar tambe a haci un yamada na comunidad pa yega diadomingo awo.



Ta importante pa separa desperdicio na cas caba y asina facilita y agilisa e proceso pa asina mes hende por haci uzo di e oportunidad aki. Lo tin diferente container entre otro pa mata y artefacto di metal, pero tambe pa palo y desperdicio general.

Representante di Ministerio di Naturalesa, sr. Chris James a haci un apelacion na e comunidad

di pariba di brug y vecindario, pa no perde e oportunidad di e accion aki.

E prome edicion a resulta den un exitoso caminda e comunidad di pariba a haci bon uzo, pa di manera gratis, deshaci di tur desperdicio den cura.


Tin un necesidad grandi pa tipo di iniciativanan manera Baki den Bario, mirando cu desde cu a cera

e dump na Parkietnbos, e sitionan asigna pa hiba desperdicio residencial ta limita pa den siman y pa hopi e ta impagabel.


E ekipo dinamico di Baki den Bario ta responde debidamente na e yamada di comunidad y ta pone bakinan den bario strategicamente pa yega na e meta comun, un Aruba limpi y dushi pa biba.

POLIS Y AMBULANS A BAY PA PERSONA MALTRATA Y CORTA DEN WILHELMINASTRAAT

Diaranson mainta a drenta informe di cu tin un persona mal herida benta otro banda di caminda di Elmar na Wilhelminastrat, mesora a dirigi tanto polis como ambulans na e sitio. Na yegada di e patrulla a bin compronde cu aki ta trata di un adicto ambulante maltrata y corta, polis no a logra saca afor kiko exactamente por a pas'e. Na yegada di e ambulans nan a atende y a transporte pa hospital.



SV BRITANNIA A RICIBI CHARLA DI ANTI DOPING Y FAIR PLAY



Diaranson ultimo Comite Olimpico Arubano a dun e hungadornan di SV Britannia un charla di anti doping y fair play. E charla a wordo duna door di e equipo di Arunado Sra Angelique Koolman, Sra Roraima Arends y Sr Patrick Werleman. Tambe tabata presente dr. Vargas cu ta e docter indica pa biah cu e delegacion di SV Britannia pa Trinidad and Tobago di 23-29 juli proximo pa participa na CFU Club Shield.


Nos por a nota cu e participacion di e hungadornan y dirigentenan di e equipo campeon di Aruba tabata sumamente halto y interactivo. Arunado aduna splicacion ampliamente na e proceso di control di



doping y tambe ariba otro topiconan manera e TUE, riesgo di uzo di suplemento y tambe con pa hanja informacion via globaldro. com si un medicamento tin substancianan prohibi. Pa local ta match fixing tambe a dedica hopi atencion pa tanto hungadornan y dirigentenan no comparti informacion sensativo di bo team, no bet ariba bo propio wega of deporte

general y no manipula bo wega.

SV Britannia como back to back campeon di Aruba kier gradici Arunado pa duna e charla aki na nos organisacion y sigur nos organisacion ta mas conciente di local ta fair play y anti doping. SV Britannia lo ta biahando pa Trinidad di 23-29 juli y clasifica lo mester keda te dia 4 augustus 2025.



100 DIA DI COMPROMISO: FRACCION AVP TA KEDA FIRME DEN SU ROL LEGISLATIVO Y DI SUPERVISION

ORANJESTAD (9 di juli 2025) - Awor cu coalicion AVP-FUTURO a marca su prome 100 dia di gobernacion, Fraccion AVP den Parlamento di Aruba ta reflexiona cu orguyo y determinacion riba e papel importante cu e fraccion ta sigui desempeña den e proceso di maneho di nos isla.

Como representante di pueblo, Fraccion AVP tin un responsabilidad fundamental: vigila, controla y orienta e rumbo cu e coalicion a defini pa Aruba. Den e 100 dia aki, nos parlamentarionan no a keda atras: nos a tuma e iniciativa pa pidi transparencia, claridad y dunament'i cuenta riba tur plan y gasto publico.

A convoca varios audiencia y reunion cu diferente minister, pa existi respuesta na cientos di pregunta cu ta importante pa pueblo. Asuntonan manera aviacion, salud, infraestructura, finanzas y educacion a pasa den e control parlamentario,

pa garantisca cu e plan di gobernacion ta alinea cu necesidad real di Aruba.

Nos fraccion tambe a tene dialogo constante cu stakeholdernan di comunidad – for di organisacionnan no-gubernamental y empresarial – pa scucha, evalua y formula politicanan cu tin un base real. E contacto structural aki ta duna base y direccion na e rol cu nos mester hunga den formulacion di ley y aprobacion di presupuesto.

Den contexto di e presupuesto nacional, Fraccion AVP ta pone enfasis riba un uzo balansa y responsabel di fondo publico.

E prome 100 dia a demostra cu Fraccion AVP ta activo, alerta y presente. Nos ta keda comprometi na sigui eleva e nivel di gobernacion, no solamente cu palabra, pero cu accion concreto y trabou duro den beneficio di tur Arubiano.



Oracion di dia

**"DUNA TA HACI HENDE MAS FELIZ CU RICIBI.
" ECHONAN 20,35B**

Ruman awe San Pablo ta bisa nos pa nos ta alerta pa nos tene cuidao cu halsamento sea di nos mes of di nos ruman.

Especialmente esnan cu tin

grupo di oracion of otro gruponan mester resa pa nos keda humilde pa nos comparti e Palabra y no instrui so sino, forma y duna oportunidad na esnan forma pa expresa sin husga, ni balota nan paso e Palabra di Dios ta di y pa nos tur grandi y chikito, pover of rico na fe, pa nos tur y ta p'esey cada bes cu nos scucha of lesa e Palabra nos tin cu tum'E, pa nos prome! Nos no por lubida cu e Palabra ta trata amor berdadero y ta p'esey nos tin cu tene bon cuenta cu nos ruman cu ta den necesidad tanto material como spiritual, sin pensa dos biaha. Asina mi ruman nos lo tin goso den Señor cu ta Esun prome cu ta duna nos tur, tur cos cu amor, paz y alegria!

Oracion: Señor Hesus, mi Señor y mi Dios, ata mi aki uza mi como instrumento pa plama bo Palabra, bo amor y bo misericordia cu mi ruman y probecha di e goso cu Abo tin ora Bo ta duna nos. Amen.

Clasificados

Icons representing various services: car, house, shopping cart, briefcase, tools, and people.

Image of a person reading a newspaper with the word "CLASSIFIEDS" visible.

SOLODIPUEBLO@GMAIL.COM
CEL.585 9500

SOLO Di Pueblo logo with the tagline "BRINDANDO FUERTE • TRECENDO CLARIDAD"

FORTALEZA PA FAMIA

Scirbi pa Pastor Marcel Balootje.

PA DIOS NADA TA IMPOSIBEL, TIN YUDANSA PROFESIONAL, E BOLUNTAD PA CAMBIA MESTER TEY

Cristo Hesus ta nos Sanador, e palabra di Dios ta bisa cu den su yaganan nos ta sana, esey a wordo demostra den milagernan cu te awe ainda ta tumando lugar den bida di hopi hende.

Senjor tey pa yuda, y tambe E a pone dokter y especialista pa yuda, pa asina hende por wordo alivia di nan malesa, of di nan problema of di nan depresion of adiccion.

Pero tin un otro banda cu ta di vital importancia, ta ora e persona mes ta desea di henter su curason pa tin un cambio den su bida, especialmente den su salud. Pasobra na e momento ey e palabra cu ta yama cooperacion ta bini fuertemente dilanti.

Hopi biaha tin hende ta den un situacion, cu hopi ta puntra dicon e persona no ta cambia, dicon e no ta laga los for di e situacion, of dicon e no por sali, for di e stiucion, y hopi biaha ta resulta cu e persona no kier coopera ni tampoco abstene for di locual ta hacie malo.

Simplemente bisa e maligno ta hinca den su cabes, cu ora e ta malo e ta bon y ora e ta bon e ta malo, por ehempel ora e ta burachi of droga e ta persona great, pasobra su mente ta confundi entre malo y bon.

Namaan tabata un leproso, e a bishita e profeta Eliseo, y Eliseo a manda su cria bisa Namaan kende tabata un General di Ehercito, un homber rico, cu e mester bay banja siete biaha den riu Jordan. Namaan a rabia masha ora cu e a tende cu esey ta e recept pa cura di su malesa. Pero despues di varios conseho e a dicidi di bay banja 7 biaha den riu manera e profeta a bise y e a wordo cura completamente.

E yiu perdi ora e a realisa cu na cas di su tata hasta e sirbidornan ta biba mihor cune, e a dicidi di bay bek cas di su tata. E a dicidi di coopera cu su mes, pasobra si un hende no kier coopera cu su mes, ningun otro hende por hacie pe. Asina ta e a bolbe bek cas di su tata y tur hende sa kico a pasa , con su bida a wordo restaura.

Tin hopi hende ta husa e palabra “Willpower”, pero nan ta lubida cu tur hende cu somete nan “willpower” na Cristo Hesus nan bida ta wordo cambia, pasobra si bo keda para riba bo mes “willpower” nada no ta pasa, pasobra bo mes no por yuda bo mes.

Pesey e palabra di Dios ta bisa den Santiago 4:7 : Pesey somete bosu mes na Dios, resisti e diabel y e lo huy for di bosu, hala serca Dios y e lo hala serca bosu.

Tur esnan cu entrega nan “willpower” na Cristo Hesus completamente , a wordo libera completamente, pasobra nan a dicidi pa rechasa locual ta haci nan danjo y acepta locual ta haci nan feliz.

Ayudo profesional ta di acepta, pero ayudo spiritual ta bini di ariba y e tin dominio riba tur cos. Hesus a bisa su disipelnan cu tin spirito cu no ta sali si no ta pa medio di oracion.

Esey ta nifica cu sabiduria profesional ta bon, pero sabiduria di Dios ta exelente, y e ta surpasa tur sabiduria humano.

Awel laga nos tur aserca e trono di gracia di Dios, pasobra Dios ta fiel, y asina nos por hanja Su ayudo y sanacion na tempo.

Sinceramente, Pastor Marcel Balootje.

SUDOKU

	3		2		9		7	
9			4	1	3			8
		1		7		3		
7	1			4			9	5
	8	6	9		7	4	3	
5	9			2			8	7
		8		6		9		
6			1	3	2			4
	4		8		5		6	

		6	7		4	9		
	5			6			8	
2								5
3								1
1								2
	8						3	
		7				6		
			3		9			
				8				

	7			6				9
6			5				8	
		4				7		
	3				6			
2				5				8
			4				1	
		3				4		
	2				7			3
1				8			2	

MINISTER CICILIA RIBA SHEN DIA DI GOBERNACION: ARUBA POR TA ORGUYOSO CU NAN TIN UN GOBIERNO CU TA CONECTA CU PUEBLO



Gabinete AVP-FUTURO a cumpli shen dia den gobernacion. P'e ocasion aki ta di importancia pa comunica bek na comunidad rib'e trabounan haci durante e prome shen dia di trabou. Durante e evento di celebracion, Minister di Turismo, Transporte y Labor, mr. Wendrick Wendrick Cicilia a inicia bisando cu: "Dios no ta uni casualidad, Dios ta uni proposito". E gobierno di AVP-FUTURO ta yama pa crea un miho condicion di bida pa nos hendenan, eleva nos pais n'e siguiente nivel y crea oportunidad nobo pa nos hendenan.

Prome cu e mandatario a comunica rib'e exitonan di trabou durante e shen dia di gobernacion, el a tuma e momento pa informa e comunidad cu e ta un privilegio pa n'un edad asina corto, ricibi e oportunidad pa siribi Pais Aruba. Despues di cada conseho di ministro, e ta sali cu mas conocimiento y experiencia pero mas ainda, contagia cu e actitud pa sirbi.

Den shen dia por mira bek riba un gobierno cu ta inspira confansia. For di e prome dianan den gobernacion, a comproba cu e gobierno a cumpli cu locual el a bisa cu lo haci. E tabata un trabou conhunto, entre henter e gabinete. "Despues di shen dia, Aruba por ta orguyoso cu nan tin un gobierno cu ta conecta cu pueblo", asina Minister Cicilia a comenta.

Turismo

"Turismo di Aruba t'e curason di nos economia". Ta e tarea como minister pa cambia e acento di turismo pa garantisar cu comunidad y nos hendenan ta beneficia mas di e industria. Tin cambionan fundamental cu mester wordo haci. Den e prome shen dianan a convoca un dialogo nacional p'un vision nobo pa turismo, caminda ta enfoca riba balor y no riba volumen.

Royal Schiphol Group (RSG)

Den e prome dies dianan di gobernacion e proceso di concretisa un acuerdo nobo cu RSG tabata di sumo importancia pa por continua cu e relacion di trabou. E tabata importante p'un acuerdo cu RSG mirando e standardnan halto cu nos tin cu cumpli cu ne. A firma un MOU cu RSG caminda a establece un momento historico despues di un periodo turbulento cu e gobierno anterior. A base di dialogo, argumento funda y liderazgo a logra y awo ta den ultimo fase di negociacion cu RSG. E proyecto di Gateway 2030, a ricibi confirmacion cu den un periodo di 3 pa 4 aña, lo termina cu e proyecto.

E mandatario kier mira mas diversificacion di destinacionnan p'asina nos ta menos dependiente di e mercado Norte Americano,

pensa aki rib'e mercado Latino America (LATAM) y Europa. Ya a logra cu pa fin di aña, KLM Royal Dutch Airlines lo aumenta su vuelonan pa Aruba.

Pa cu TPEF, tambe kier mira cambio den su acento. Minister Cicilia kier pa inverti mas den locual cu ta haci nos industria exitoso, cual ta nos hende- y nos recursonan natural. Esey ta haci e producto Aruba diferente na cualkier otro destinacion.

Labor

Locual ta remarcabel den e sector laboral ta cu diferente departamento di gobierno a vocifera cu nan a sinti nan mes bandona durante e ultimo añanan, pero awo, cu aire fresco: ta sinti cu tin un gobierno porta habri y cla pa yuda resolve asuntonan na bienestar di nos trahadonan. A scucha e preocupacionnan pa cu scarsedad di empleadonan p'e sector mas importante di nos pais, cual ta turismo. Mesora a pospone temporariamente e proceso di 'arbeidsmarktoets' cual ta agilisa e proceso.

Aruba awo ta conta cu lasonan mas estrecho cu organisacionnan internacional. A intensiva e relacionnan aki cu International Labour Organization (ILO) despues di bishita di Minister Cicilia na Geneve. Tambe tabatin e honor di ricibi e presidente di ILO p'e sector di Caribe na Aruba. A haci tres peticion pa sosten tecnico for di ILO y esaki ya ta canando su caminda.

Recientemente a informa departamento di labor di un lista hopi intensivo di puntonan cu kier mira su mehoracion y modernisacion. Ta den proceso un plan di ehecucion, esaki ta



nificia cu nos trahadonan pronto por sinti nan mes mas protegi. Intermediacion labor ta riba lista di prioridad pa Minister Wendrick Cicilia. Trabou-Hub t'un proyecto cu pronto e mandatario lo anuncia. E proyecto lo encera e guia pa ricibi un empleo pero mas importante: mantene un empleo.

MINISTER MERVIN WYATT RAS: NOS NO TA PAPIA SO, NOS TA CUMPLI!



Despues di 100 dia, Gabinete AVP-Futuro ta wak bek cu orguyo riba e logro- y resultadonan, caminda cu determinacion lo sigui traha cu bista fiho na e siguiente fase di reconstruccion y renobacion.

Minister di Salubridad,

Asuntonan Social, Cuido di Adulto Mayor y Maneho di Adiccion, drs. Mervin Wyatt-Ras, a felicita Aruba y Gobierno cu e logronan realisa den e prome 100 dianan di Gabinete AV P-Futuro: Husticia social y cuido pa mayornan. Un di e logronan principal den e prome 100 dianan



ta e prome aumento di 250 florin den e reparatietoeslag na casi 20.000 pensionado, y alrededor di 4.000 persona cu derecho di pension di viudo of di huerfano. Gabinete AVP-Futuro tin e compromiso cu e pensionadonan pa logra e aumentonan adicional den fase. Otro logro ta e restauracion di cuido medico husto

lo conoce aumento. Esaki ta yuda pa crea igualdad di oportunidad, derecho pa educacion y derecho pa un futuro cu miho perspectiva pa tur mucha, sin cu nan situacion socioeconomico ta obstaculisa nan. Minister Wyatt-Ras a expresa di ta “contento

y orguyoso di por traha hunto dedica na e pueblo di Aruba y cu curason na e caminda corecto”. Pabien Gobierno AVP-Futuro, pabien na nos parlamentarionan, pabien na un y tur cu e 100 dianan di logro den gobernacion.



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - July 10, 2025

 Sorteo # 8591 0643 6949 9249  X2  Sorteo # 7635 8096  X2  Sorteo # 2340 9551  Sorteo # 6394 5650 Aries  Sorteo # 1324 205  X2	 Sorteo # 2608 0 x Jackpot 0 x Match 4+ 8 x Match 4 163 x Afl. 12,00 10-17-25-30-31 Joker 27 Letter D Proximo Jackpot 220.000,-	 Sorteo # 6881 0 x Jackpot 4 x Match 4 132 x Afl. 8,00 05-06-10-11-26 Proximo Jackpot 51.000,-	 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Mega Ball Proximo Jackpot 250.000,- Afl. 350.000,-	 Sorteo # Sorteo # 196 #VALUE! 237177 
--	---	--	--	--

in loving memory of



DR. RODERICK G. "RORY" ARENDS
*01-08-1939 - † 30-06-2025

Aruba mourns the loss of Rory Arends, a pioneer of Aruba's tourism industry and former Director of the Aruba Tourism Bureau, known today as the A.T.A., and former CEO of AHATA. Rory played a key role in the development of our tourism industry thereby securing Aruba's economic future. We honor his leadership, vision, and lifelong dedication to Aruba.

A tribute and mass will be held on Thursday July 10, 2025, at San Francisco di Asis Church in Oranjestad from 2:00 to 4:00 PM. Condolences can be extended at Aurora Funeral Home on Friday, July 11, from 6:00 to 9:00 PM. The final resting ceremony will take place on Saturday, July 12, from 9:00 AM to 12:00 PM, followed by the burial at the Catholic Cemetery in Oranjestad.



A amplia e lista positivo di AZV cu un cantidad di remedi esencial cu awor AZV ta cubri bek y ta disponibel na botica sin pago adicional. E coreccion aki ta restaura e inhusticia di e medidanan di recorte tuma pa e gobierno anterior y ta enfatisa e meta di AZV como un proveedo social y e curason social di e Gabinete aki. Ademá Ministerio di Salubridad Publico a percura pa proteccion pa famianan vulnerabel. Pa e aña escolar nobo, e subsidio escolar, contribucion di mayornan y apoyo financiero pa mayornancutadenbijstand

“Dios ta Amor...y Amor ta Dios”

Maske mi no ta na e mundo aki, tur biaha lo mi ta banda di boso Curason,
Mi por stens di loke Señor ta hasi” Salmo 33
Cu hopi tristesa den nos curason nos ta anuncia perdida di un
heroe di Turismo, un icono pa Aruba su Desaroyo den su totalidad.

Mayornan: † Dr. Jacob “Coco” Rudolf Arends y
† Sofia Margarita Maria Arends

Felismente Casa: † Lucia Casimira Arends- Krozendijk
Alegria di Yiu: Abigael Noelia Sofia Arends
Sgt. Peppers Compañe: Dushi Arends

Persona di cuido y di cas priva: Cristina Mateo Ramirez “Cristina”
Diana Patricia Castaño Osorio “Diana”
Luz Marina Moreno Cantillo “Luz Perdomo”
Abigael N.S. Arends “Mi Yui”

Divorcia di mama di su yuinan: † Orquidea Maria “Tonia” Villasmil y famia
Yuinan : † Roderick “Rorito” G. Arends Jr.
na Naples, Florida, USA Edith “Tita” Arends (†-Simon)
Joalis Arends (- Brokke)

Nieto(a)nan : Justin Brokke y famia
Kaihle Brokke y famia
Tahnyshah “Tahny” Simon y Famia
Táickie Simon y Famia

Ruman: † Jacob “Ru” Rudolf Arends y famia
Subrino: Jacob “Ruudje” Rudolf Arends Jr. y famia, Rusette Arends y famia
Amigo Manera Ruman: † “Cobito” Angela y famia, Mirto Granadillo y famia, Michael Kuiperi y famia,
Alonsio Geerman y famia, Ramiro Krozendijk y famia, Eduardo de Kort y famia



Dr. Roderick “Rory” Gilbert Arends
***01-08-1939 †30-06-2025**

Ex- Director di ATA, ex CEO di AHATA y Vice
President di ELSKA Foundation

Subrino(a)nan, Swa y cuñanan, Primo(a)nan, amigo y conocirnan, bisiñanan

Demas famia na Aruba y afo; Arends, de Veer, Raven, Dubero, Martines, Danies, Nicolaas, Croes, Hintz, Oduber, Maduro, Thiel, Rasmijn, Villasmil, Krozendijk, Lacle, Bruin, Henriquez, Martinez, Nucete, Tromp, Rico, Hooker, Giel, Harms, Vela Delgado, Fowler, Richardson, Nisbet, Werleman, Kock, Brown, Vargas Sanchez, van der Veen, Quant, Maynard, van der Ree, Eman, Aguirre Giol, Daantje, van den Bosch, Zapata Gómez, Montilla Mavares, Geraci, Bikker, Heronimo, Frigerio, Pietersz, Leon, Theysen, Brugès, Bedoya Giraldo, Garcia, Bislik, Piedrahita Garcia, Muñiz Lopez, Yarzagaray, Diaz, Muños Navarro, Vrolijk, Pãris, Vingal, Ruiz, Muyale, Hassell, Quigley, Meyers, Yegüez Gomez, Weaver, Mansur, Marugg, van Gulick, Tavera Rodriguez, de Cuba, Agudelo, Mathilda, Colina, de Windt, Urueta Arias, de Haseth, Kelly, Pabón Cantillo, Ruta,

Ceremonia na Misa pa e duna honor y cumpli cu su promesa.

Ta invita pa acto di despedida cu lo tuma lugar dia 10 di Juli 2025 na Misa San Francisco di Asis na Oranjestad di 2’or pa 4’or di merdia.

Ceremonia Protocolar pa gradici pa a traha pa Aruba y mundo.

Condolencia lo tuma lugar na Aurora Funeral Home dia 11 di Juli 2025 na Aurora Funeral Home di 6’or di atardi pa 9’or di anochi.

Ceremonia Ultimo Descanso pa e reuni cu su famia den su Gloria.

Acto di entiero lo tuma lugar cu su grupo di famia, amistadnan y ex coleganan di ATA, AHATA, ELSKA Foundation, dia 12 di Juli 2025 di 9’or di mainta pa 12’or di Merdia y lo bai pa Santana Catolico na Oranjestad.

Despues di entiero no ta ricibi bishita di condolencia na cas.

Nos desculpa si den nos tristesa nos por a lubida cualkier persona.